



Buletini mujor

Korrik 2025



Kryetari i KLSH-së priti në takim drejtuesit e lartë të Fondacionit Westminster për Demokraci (WFD)

Në datë 3 qershor 2025, Kryetari i Kontrollit të Lartë të Shtetit, z. Arben Shehu priti në takim përfaqësuesit e lartë të Fondacionit Westminster për Demokraci (WFD).

Z. Shehu u takua z. Chris Levick, Drejtor Rajonal i WFD-së për Europën dhe Azinë Qendore. Gjithashtu, në takim ishin të pranishëm Zv. Drejtori Rajonal i WFD-së për Ballkanin Perëndimor, z. Damir Neziri; Drejtorja e WFD-së për Shqipërinë znj. Valbona Kuka, si dhe përfaqësues nga Ambasada Britanike në Tiranë. Takimi u zhvillua në kuadër të bashkëpunimit bilateral me Zyrën Kombëtare të Auditimit të Mbretërisë së Bashkuar (NAO UK).

Gjatë takimit u dakordësua për vazhdimin e bashkëpunimit për ndërtimin e kapaciteteve institucionale, në koordinim me partnerët ndërkombëtarë, duke përfshirë NAO UK dhe homologët rajonalë.

KLSH ka implementuar me sukses disa programe trajnimi të mbështetura nga WFD, për përmirësimin e teknikave dhe metodave të hartimit të raporteve të auditimit, zhvillimin e strategjisë së komunikimit institucional etj.

Këto iniciativa synojnë hartimin e një strategjie komunikimi dhe mekanizma të përmirësuar raportimi me Parlamentin, shoqërinë civile dhe median, me fokus në rritjen e transparencës dhe llogaridhënies. Me mbështetjen e WFD, në muajin mars 2025, ekspertë të lartë të Zyrës Kombëtare të Auditimit të Mbretërisë së Bashkuar zhvilluan trajnime me auditues dhe specialistë të KLSH-së mbi teknikat e shkrimit të raporteve të auditimit dhe Strategjinë e Komunikimit të institucionit. Kjo ishte hera e parë që ekspertë të NAO UK ishin në Shqipëri për të ofruar asistencë teknike në KLSH. Më 20 mars 2025, Kryetari i KLSH-së, z. Arben Shehu priti në takim ekspertët e NAO UK, z. Benjamin Peters, Drejtues i Komunikimit me Jashtë; z. Dan Gluckman, Menaxher i Lartë për Komunikim Dixhital; znj. Natalie Low, Menaxhere e Lartë e Auditimit. Në takim u theksua rëndësia e bashkëpunimit mbi zhvillimin e metodologjive të përparura që ofrojnë rritjen e standardeve profesionale.

Statistika



86 auditime
janë në proces

56 auditime
të publikuara në
web

**29 ankesa/
kërkesa për**
informacion

12 vende
vakante pune
të shpallura

Zbatimi i rekomandimeve të lëna në auditime

Kontroli i Lartë i Shtetit ka përmbyllur raportin "Zbatimi i rekomandimeve të lëna në auditimet e mëparshme" (pjesa I) . Raporti është dorëzuar në Kuvendin e Republikës së Shqipërisë.

Procesi për ndjekjen e zbatimit të rekomandimeve, inicimi dhe zbatimi i masave korrigjuese nga subjektet e audituara jep një informacion të detajuar mbi vlerën e shtuar që sjell puna e KLSH-së në administrimin e financave publike.

Konsolidimi i një mekanizmi efektiv i verifikimit sistematik dhe raportimit të zbatimit të rekomandimeve i lejon jo vetëm KLSH-së, por dhe palëve të treta, Kuvendit, Qeverisë etj., të sigurojnë në vijimësi një informacion të plotë, lidhur me veprimet e ndërmarra nga ana e subjekteve të audituara për hartimin e dokumenteve strategjike apo për iniciativa për ndryshime ligjore, administrative dhe organizative.

Skema dhe qasja e përdorur për ndjekjen e zbatimit të rekomandimeve synojnë të prodhojnë indikatorë të konsoliduar institucionalë sa i takon pranueshmërisë dhe zbatueshmërisë së rekomandimeve, duke mundësuar në këtë mënyrë rritjen e mbikëqyrjes parlamentare nga ana e Kuvendit ndaj Ekzekutivit, me qëllim rritjen e përgjegjshmërisë së menaxhimit të fondeve publike.




TREGUESIT KRYESORË



1641 REKOMANDIME TË LËNA GJITHSEJ

Nga verifikimet e kryera për 42 auditime lidhur me nivelin e zbatimit të rekomandimeve të lëna në auditimet e mëparshme, rezultoi se janë dhënë gjithsej 1641 rekomandime për subjektet e audituara.



1639 REKOMANDIME TË PRANUARA OSE 99%

Lidhur me nivelin e zbatimit të rekomandimeve të lëna, rezultoi se nga 1641 rekomandime të dhëna gjithsej, 1639 masa ose 99.9% janë pranuar plotësisht dhe pjesërisht dhe nuk janë pranuar 2 masa ose rreth 0.1%.



1092 MASA TË ZBATUARA DHE NË PROCES OSE 67%

Nga verifikimi i zbatimit të rekomandimeve rezultoi se 1092 masa ose rreth 67% e tyre rezultuan të zbatuara plotësisht, pjesërisht dhe në proces zbatimi. Në mënyrë më të detajuar janë zbatuar plotësisht 674 masa (41%), pjesërisht 243 masa (15%); janë në proces zbatimi 175 (11%).



547 MASA TË PAZBATUARA OSE 33%

Në përfundim, për të gjitha masat që kanë rezultuar me statusin "pa zbatuar" (547 masa ose 33%) dhe "zbatuar pjesërisht", nga KLSH është rikërkuar zbatimi i plotë i tyre. Ndërsa për masat me status "në proces zbatimi" inkurajohet përsheptimi i procesit deri në zbatimin e plotë të tyre.



870 Masa organizative



458 Masa disiplinore



263 Efekte financiare (në numër)



38 Masa administrative



12 Masa për përmirësime ligjore

18 Auditime të kombinuara

13 Auditime përputhshmërie

9 Auditime performance

1 Auditim financiar

1 Auditim tematik

Auditimi tematik “Mbi monitorimin e HEC Sasaj”

Kontrulli i Lartë i Shtetit ka përfunduar auditimin tematik “Mbi monitorimin e HEC Sasaj”, Sarandë, për periudhën nga fillimi i koncesionit deri më 31.01.2025. Ky auditim në kohë reale nisi menjëherë pas çarjes së digës së hidrocentralit të Bunecit.

Auditimi është ushtruar në Ministrinë e Infrastrukturës dhe Energjisë (MIE) dhe Agjencinë Kombëtare e Burimeve Natyrore (AKBN).

Nga ky auditim janë konstatuar disa mangësi, të cilat në mënyrë të përmbledhur janë si më poshtë:

- Struktura mbajtëse, rrethuese e basenit të presionit kishte pësuar dëmtim, për pasojë derdhje të ujit të depozituar, duke shkaktuar dëme të bimësisë në rrjedhën e malit si dhe në banesa, biznese dhe infrastrukturë.
- Nga ana e AKBN-së nuk janë realizuar monitorime të mjaftueshme për hidrocentralin “Sasaj”, por dhe për HEC-e të tjerë. Mungesa e monitorimeve ka lidhje me mosrespektimin nga ana e koncesionarëve të marrëveshjeve përkatëse për paraqitje dokumentacioni në mënyrë periodike, si dhe me mangësi në inspektimet që realizohen në këto HEC-e nga ana e AKBN-së.
- Nga ana e koncesionarit nuk janë marrë masa të vazhdueshme për sigurinë e veprave përbërëse të HEC “Sasaj” dhe parandalimin e ngjarjeve të tilla.
- Nga ana e AKBN-së janë inspektuar veprat përbërëse të HEC “Sasaj” pas dëmtimit, por nuk ka asnjë korrespondencë në lidhje me masat që duhet të marrë koncesionari, as me organet e pushtetit vendor dhe as me vetë koncesionarin për kompensimin e dëmeve.
- Koncesionari nuk ka realizuar punimet dhe nuk ka vënë në shfrytëzim HEC-in në kohën e parashikuar në marrëveshje, megjithatë nuk janë respektuar përcaktimet e kësaj marrëveshjeje për aplikimin e penaliteteve.
- Koncesionari nuk ka zbatuar detyrimet kontraktore në lidhje me mirëmbajtjen dhe investimet periodike që duhet të kryeshin në veprat e HEC “Sasaj”.
- Nga verifikimi i dokumentacionit si dhe në objekt rezulton se fuqia e instaluar për hidrocentralin “Sasaj” është 8600 kW. Referuar përcaktimeve të kontratës koncesionare, fuqia e projektuar dhe e miratuar për këtë vepër është 5,500 kW. Ky devijim nga përcaktimet e kontratës përbën shkelje të drejtpërdrejta të marrëveshjes koncesionare dhe shoqërohet me problematika të natyrës teknike, të cilat ndikojnë në funksionimin optimal të vepërës.



Auditimi në Agjencinë Kombëtare të Zonave të Mbrojtura Tiranë dhe AdZM Kukës, Berat, Vlorë

KLSH ka ushtruar auditim në Agjencinë Kombëtare të Zonave të Mbrojtura (AKZM) dhe Administratën e Zonave të Mbrojtura (AdZM) Kukës, Berat, Vlorë. Nga ky auditim janë konstatuar disa problematika, të cilat në mënyrë të përmbledhur janë si më poshtë:

- Parregullsi në dokumentacionin e paraqitur nga subjekti kërkues dhe në procedurën e shqyrtimit dhe vlerësimit të kërkesave nga strukturat e AdZM-ve dhe AKZM-së. Sektori i Menaxhimit në AdZM-të nuk ka përcaktuar dhe përshkruar në mënyrë specifike objektin e veprimtarisë së lejuar që do të ushtrohet në zonën e mbrojtur.
- Për periudhën janar 2022 deri më 30.09.2024 nga Drejtoria/Sektori i Monitorimit në AKZM dhe AdZM-të janë kryer 636 inspektime dhe, sipas procesverbaleve të mbajtura në vend, është vlerësuar dëm në vlerën prej 590,457,704 lekë; përkatësisht: nga zjarret, 157 raste me vlerë 260,795,000 lekë; nga veprimtaritë e kundraligjshme (prerje drurësh, gurë dekorativë etj.); 479 raste me vlerë 329,662,704 lekë. Nga auditimi i pasqyrave financiare u konstatua se kjo vlerë nuk është kontabilizuar si detyrim dhe nuk është arkëtuar për periudhën objekt auditimi, duke sjellë të ardhura të munguara në buxhetin e AKZM-së.



- Deri më 30.09.2024, nga AdZM dhe AKZM janë lidhur gjithsej 105 kontrata qiraje për dhënie në përdorim të sipërfaqeve në zonë të mbrojtur. Nga auditimi u konstatua se 53 prej tyre në vlerë 397,013,980 lekë rezultuan me detyrime të papaguara dhe të pakontabilizuara. Përkatësisht: 27 subjekte me veprimtari ekonomike të ndryshme me detyrim në vlerë 29,505,449 lekë; 26 HEC-e me detyrime të papaguara në vlerë 367,508,531 lekë, të cilat përbëjnë të ardhura të munguara për buxhetin e AKZM-së.
- Brenda zonave të mbrojtura u konstatuan 784 ndërtime informale, të cilat janë krijuar kryesisht para vitit 2015, para formimit të Agjencisë Kombëtare të Zonave të Mbrojtura. AKZM ka njoftuar institucionet ligjzbatuese, si: IKMT, Drejtorinë e Policisë dhe Prokurorinë e qarkut përkatës, për të gjitha rastet gjatë periudhës 2022-shtator 2024, prej të cilave nuk konfirmohet të kenë kthyer përgjigje zyrtare, duke mos vijuar me procedurat e mëtejshme, me qëllim ndëshkimin sipas ligjit të subjekteve/personave përgjegjës.

Auditimi në Drejtorinë e Përgjithshme të Pronës Publike

KLSH ka audituar Drejtorinë e Përgjithshme të Pronës Publike në ish-Ministrinë e Financave dhe Ekonomisë, aktualisht, Drejtoria e Përgjithshme e Pronës Shtetërore në Ministrinë e Ekonomisë, Kulturës dhe Inovacionit (MEKI). Në përfundim të auditimit të ushtruar për periudhën 01.01.2023 deri më 31.12.2023, rezultoi se:

- Për periudhën objekt auditimi nuk janë hartuar politika dhe plane të veprimit për privatizimin e shoqërive shtetërore tregtare në sektorin strategjik dhe jostrategjik, si dhe të aseteve shtetërore.
- Nuk janë përgatitur relacione, përmbledhje apo raportime periodike lidhur me proceset e privatizimit dhe shitjes së pronës përgjatë vitit 2023.
- Strukturat e monitorimit të pronës shtetërore gjatë vitit 2023 nuk kanë kryer një proces efikas të monitorimit të kontratave të qirasë, me qëllim përmbushjen e detyrimeve kontraktuale të tyre deri në llogaritjen e mbajtjen e penaliteteve.
- Nuk janë miratuar në kohë treguesit financiarë dhe pasqyrat financiare të shoqërive aksionere me kapital 100% shtetëror nën administrim të Ministrisë përgjegjëse për Ekonominë, të cilat në shumicën e tyre rezultojnë me humbje, e cila thellohet vit pas viti. Konkretisht, për vitin 2022 rezultojnë me humbje 8 shoqëri, në shumën 2,446,746 mijë lekë. Konstatohet mungesa e një analize për nxjerrjen në pah të faktorëve të cilët ndikojnë në përkeqësimin e gjendjes financiare të këtyre shoqërive me qëllim përmirësimin e situatës.
- Nuk janë monitoruar 9 shoqëri të shpallura në likuidim, të cilat rezultojnë me humbje e në vështirësi të theksuara financiare, duke i lënë jashtë vëmendjes e vendimmarrjes institucionale, me pasoja në administrimin e pronës që ato menaxhojnë dhe të cilat administrojnë pasuri të paluajtshme në shumën 6,852,990 mijë lekë, si dhe kanë krijuar detyrime ndër vite gjithsej në shumën 2,225,667 mijë lekë, si detyrime ndaj punonjësve e këshillave mbikëqyrës, sigurimeve shoqërore dhe ndaj të tretëve.
- Vijon të mbetet dividend i prapambetur, i pa likuiduar në shumën 4,054,214 mijë lekë.



- Konstatohet një numër i lartë objektesh për të cilat evidentohet se edhe pse kanë kaluar vite që nga momenti i inicimit të procedurave për privatizim (nisur që prej vitit 2007), procesi i privatizimit nuk ka përfunduar dhe nuk ka konkluduar në shitje të pronës. Tejzgjatja në kohë e procesit të privatizimit, shoqëruar me mospublikimin e pronave në proces privatizimi për të cilat është marrë miratimi, rrishtet maksimizimin e vlerës së shitjes së tyre dhe përfundimin në kohë dhe me sukses të procesit të privatizimit.
- Konstatohet mungesë koherence e kuadrit ligjor si dhe problematika në procesin e monitorimit dhe vlerësimit të sipërfaqeve të ndërtuara në tejkallim të lejes së ndërtimit.
- Në përfundim të auditimit rezultuan efekte negative nga mosvendosja e penaliteteve në zbatimin e kontratave të qirasë "1 euro" në shumën 102,556 mijë lekë; të ardhura të munguara nga mosarkëtimi i detyrimeve të qirasë nga subjektet qiramarrëse në shumën 2,218 mijë lekë; efekte negative nga administrimi dhe shitja e pronës në shumën 43,402 mijë lekë.

Auditimi në Korporatën e Investimeve Shqiptare

KLSH ka përfunduar auditimin në Korporatën e Investimeve Shqiptare SHA, për periudhën 17.10.2019-30.06.2024, duke i kushtuar vëmendjen e posaçme, ndër të tjera, çështjeve që lidhen me njohjen e aktivitetit ekonomiko-financiar të saj dhe organizimin e funksionimit sipas rregulloreve të miratuara; vlerësimin dhe funksionimin e sistemit të menaxhimit financiar dhe kontrollit, auditimin e pasqyrave financiare, detyrimeve të prapambetura etj.

Në përfundim të auditimit rezultoi se:

- Planifikimi buxhetor i Korporatës së Investimeve Shqiptare (KISH) është kryer në mënyrë të pamjaftueshme dhe pa argumentim të detajuar, me mospërputhje të konsiderueshme ndërmjet parashikimeve dhe realizimeve, duke ndikuar negativisht në performancën ekonomiko-financiare të shoqërisë.
- Korporata e Investimeve Shqiptare nuk ka implementuar manuale, udhëzues apo metodologji të standardizuara për hartimin, seleksionimin dhe menaxhimin e projekteve, duke cenuar procesin strategjik dhe realizimin e objektivave të saj.
- Projekt-propozimet e hartuara nga Korporata e Investimeve Shqiptare gjatë viteve 2022-2024 janë realizuar pa respektuar procedurat e përcaktuara, me mungesë analizash të detajuara mbi risqet, objektivat dhe përfitueshmërinë, duke pamundësuar vlerësimin e impaktit ekonomik dhe përfitimeve të mundshme.
- Nga auditimi i veprimtarisë së KISH-së, konstatohet se në vitin 2024 ka pasur një ndërprerje në realizimin e projekt-propozimeve të mëparshme, duke përfshirë ato në sektorin e energjisë dhe zhvillimit të zonave prioritare, edhe pse janë kryer shpenzime mbi kontraktimin e ekspertëve të jashtëm për realizimin e para-fizibilitetit.

- Nga auditimi i projekt-propozimeve në kuadër të zhvillimit të pronave shtetërore, konstatohet se nuk ka një dokument/rregullore/manual, mbi identifikimin dhe përzgjedhjen e tyre, si dhe nuk ka një analizë mbi përfitueshmërinë, kostot financiare, risqet potenciale, vlerën e shtuar të parasë, rentabilitetin e investimit, apo për hapat konkrete që do duhet të ndiqen për çdo projekt-propozim përpara shpalljes së tij, të tilla si parafizibiliteti/fizibiliteti, sikundër vepruar për projektet e periudhës 2022-2023; si dhe një analizë krahasuese nëse projekt-propozimet do të zhvilloheshin nga vetë institucionet, me financim të brendshëm nga buxheti i shtetit.
- KISH ka dorëzuar pasqyrat financiare dhe deklaratat e tatim-fitimit për vitet 2020-2023 me dy versione, duke tejkalluar afatet ligjore dhe duke u ekspozuar ndaj penaliteteve dhe interesave për mosrespektimin e afateve dhe ndryshimeve. Për më tepër, përgjegjësitë për përgatitjen e pasqyrave financiare nuk janë të mirëpërcaktuara midis Drejtorit Ekzekutiv dhe Drejtorit të Financës, duke shkaktuar paqartësi dhe mungesë të qartësisë institucionale.
- Nga auditimi u konstatua mungesë dokumentacioni për vërtetimin e përmbushjes së kriterëve nga anëtarët e Këshillit Mbikëqyrës dhe strukturë e paplotë e Këshillit, përfshirë mungesën e një kryetari gjatë periudhës 2020-2023.
- Termat e shpërblimit për anëtarët e pavarur vendas nuk ishin të përcaktuara qartë, duke rezultuar në shpërblime të ndryshme me ato të anëtarëve nga institucionet qendrore.



KLSH - ZKA zhvillojnë takime pune në Shqipëri dhe Kosovë për auditimin paralel mbi sigurinë e digave



Në datat 29-30 maj 2025 u zhvillua në Prishtinë takimi i radhës midis grupeve të auditimit të Kontrollit të Lartë të Shtetit (KLSH) dhe Zyrës Kombëtare të Auditimit të Kosovës (ZKA) në kuadër të auditimit paralel të performancës me temë *"Mbrojtja dhe siguria e digave"*.

Në këtë takim, në cilësinë e grupit të auditimit të KLSH-së morën pjesë drejtori i Departamentit të Auditimit të Performancës, z. Aulent Guri, audituesit z. Artan Topjana, z. Skënder Muça dhe Xhuljeta Çelaj. Ndërsa nga ZKA, në cilësinë e grupit të auditimit ishin drejtorja e Departamentit të Auditimit të Performancës, znj. Ariana Gjonbalaj Shala, udhëheqësja e ekipit, znj. Alba Keqa dhe znj. Kujtesa Alaj.

Grupet e auditimit diskutuan për temën e auditimit dhe objektivat e përbashkëta, për të vlerësuar menaxhimin dhe masat e sigurisë në digat e të dy vendeve, metodologjinë, dhe përputhshmërinë e planeve të auditimit, situatën parastudimore dhe çështje tjera të procesit të auditimit.

Në vijim u zhvillua edhe një vizitë studimore në digën e Liqenit të Batllavës, ku në praninë e institucioneve përgjegjëse të Kosovës të cilët shfrytëzojnë këtë digë u diskutua dhe pa nga afër gjendja në terren.

Në datat 23-24 qershor 2025, Zyra Kombëtare e Auditimit të Kosovës zhvilloi një vizitë pune 2-ditore në Shqipëri. Grupet e auditimit të KLSH-së dhe ZKA-së vizituan nga afër digën e Liqenit Artificial të Tiranës, si edhe digat e Banjës dhe Moglicës. Diga e Moglicës është edhe diga më e lartë në Shqipëri me 166.5 m lartësi dhe paraqet një rëndësi të veçantë për sektorin hidroenergetik. Kjo digë është ndërtuar në 10-vjeçarën e fundit.

Në vizitat në digat e Banjës dhe Moglicës grupet e auditimit u shoqëruan nga përfaqësues të institucioneve që mbikëqyrin sigurinë e këtyre digave. Përmes vizitave të ndërsjella në terren grupet e auditimit krijojnë një pasqyrim të plotë të situatës së digave në Shqipëri dhe Kosovë.

TAKIMI III I GRUPIT TË PUNËS SË EUROSAT-T



"Përfitimet dhe Metodologjitë e Auditimit në Kohë Reale"

U përmbyll më 6 qershor 2025 në Bukuresht takimi i tretë i Projektit Grupit të Punës së EUROSAT-t *"Mbi përfitimet dhe metodologjitë e auditimit në kohë reale"*.

Takimi i kryesuar nga Gjykata e Llogarive e Italisë (Corte dei Conti) kishte qëllim të nxiste shkëmbimin e përvojave mes Institucioneve Supreme të Auditimit të komunitetit EUROSAT, në lidhje me auditimin në kohë reale.

Takimi u organizua nga SAI i Rumanisë dhe në të morën pjesë 19 Institucione Supreme Evropiane të Auditimit (SAI).

Nevoja për auditime në kohë reale lindi nga trysnia që Institucionet Supreme të Auditimit kanë nga Parlamentet, publiku dhe palët e interesit për t'iu përgjigjur problematikave aktuale.

Në fjalën përshëndetëse, Kryetari i Gjykatës së Llogarive të Rumanisë, z. Busuioac, solli në vëmendje se sot interesi nuk është mbi zbatimin e buxheteve apo shkeljeve në procedura prokurimesh të cilat kanë ndodhur vite më parë. *"Publiku dhe Parlamenti duan të jenë të informuar se si po përdoren aktualisht paratë e taksapaguesve dhe çfarë masash po marrin SAI-t për të parandaluar keqpërdorimin e tyre, apo nëse qeveritë po iu përgjigjen në mënyrë optimale situatave të emergjencës"*.

Nëpërmjet auditimeve në kohë reale, SAI mund të ofrojë në kohë rekomandime për përmirësime. Në përfundim të takimit u miratua edhe dokumenti mbi metodologjinë dhe përfitimet nga auditimet në kohë reale.

WORKSHOPI NË PRISHTINË



"Auditimet IT - Zhvillimet dhe Sfidat"

Në datat 29-30 maj 2025 u zhvillua në Prishtinë workshop-i rajonal me temë *"Auditimet e Teknologjisë së Informacionit - Zhvillimet dhe Sfidat"*, organizuar nga Zyra Kombëtare e Auditimit të Kosovës (ZKA).

Aktiviteti kishte në fokus shkëmbimin e njohurive, forcimin e bashkëpunimit ndërmjet Institucioneve Supreme të Auditimit (SAI) dhe trajtimin e sfidave aktuale të auditimit të Teknologjisë së Informacionit (TI) në sektorin publik.

Në aktivitet morën pjesë përfaqësues nga SAI të rajonit dhe më gjerë, përfshirë Poloninë, Portugalinë, Estoninë, Turqinë, Maqedoninë e Veriut dhe Shqipërinë, si dhe përfaqësues nga organizata ndërkombëtare INTOSAI, Development Initiative (IDI). KLSH u përfaqësua nga auditueset Elira Cukalla dhe Rovena Deda.

Gjatë workshop-it, pjesëmarrësit ndanë praktikat më të mira në auditimet e TI-së, zhvillimet në përdorimin e inteligjencës artificiale në auditim, si dhe strategjitë për përbalimin e kërcënimeve kibernetike në administratën publike.

KLSH merr pjesë në konferencën e organizuar nga Gjykata e Europiane e Audituesve për “Mbrojtjen”



Gjykata e Europiane e Audituesve (ECA) organizoi në datën 30 qershor 2025 konferencën me temë “Mbrojtja”.

Në këtë aktivitet morën pjesë përfaqësues të nivelit të lartë nga ECA, Institucionet Supreme të Auditimit, përfaqësues të NATO-s dhe të institucioneve të tjera të Bashkimit Europian, anëtarë të parlamenteve të vendeve të ndryshme të BE-së, si dhe përfaqësues të organizatave që kanë në fokus të punës së tyre çështjet e mbrojtjes. KLSH u përfaqësua në këtë konferencë nga Sekretarja e Përgjithshme, znj. Valbona Gaxha, znj. Ermira Hoxha dhe znj. Anila Alcani.

Në konferencë u zhvilluan diskutime mbi disa çështje, si: e ardhmja e politikës mbrojtëse të BE-së, forcimi i gatishmërisë, financimi dhe auditimi, si dhe vendimmarrja nga Parlamenti.

Konkretisht, u diskutua për kontekstin gjeopolitik aktual dhe si BE po i përgjigjet urgjencës së transformimit të mbrojtjes dhe forcimit të sigurisë së saj, ku u paraqitën edhe perspektiva nga vendet anëtare apo ekspertë të NATO-s. Në aspektin e forcimit të gatishmërisë së industrisë mbrojtëse të BE-së, ekspertët diskutuan rreth situatës reale dhe sfidave të bazave industriale mbrojtëse të BE-së si në tokë dhe në hapësirë.



Në kontekstin e masave që po ndërmerren nga qeveritë, si dhe referuar tablosë së investimeve në fushën e mbrojtjes, e cila në vitet e fundit ka ndryshuar konsiderueshëm duke përfshirë si grantet e BE-së ashtu edhe kreditë, nga përfaqësues të SAI-ve u diskutua mbi perspektivat dhe sfidat e ndryshme që lidhen me auditimin.

Nga ana e përfaqësuesve të Parlamentit Europian dhe atyre të parlamenteve të vendeve anëtare si dhe ekspertëve të NATO-s u paraqit këndvështrimi parlamentar për politikën e mbrojtjes.



Auditues të KLSH-së, vizitë studimore në Gjykatën Turke të Llogarive (TCA) për auditimin në “Sektorin e Sigurisë”

Gjykata Turke e Llogarive (TCA) ka nisur programin mbi “Auditimin e Sektorit të Sigurisë” për Kontrollin e Lartë të Shtetit.

Programi pesëditor i trajnimit mbi “Auditimin e Sektorit të Sigurisë”, i organizuar nga TCA për delegacionin e KLSH-së, u realizua në datat 5-9 maj 2025.

Pesë auditues të Kontrollit të Lartë të Shtetit zhvilluan një vizitë studimore në Gjykatën Turke të Llogarive me fokus shkëmbimin e eksperiencave në “Auditimin e Sektorit të Sigurisë”.

Qëllimi i kësaj vizite studimore në Ankara ishte shkëmbimi i eksperiencës së Gjykatës Turke të Llogarive, në auditimin e “Sektorit të Mbrojtjes dhe Sigurisë”, duke lehtësuar ndarjen e njohurive dhe përvojave midis dy Institucioneve Supreme të Auditimit (SAI). KLSH u përfaqësua në këtë vizitë nga audituesit, z. Aldo Kume, z. Paolo Xhezo, z. Herman Imeraj, z. Henri Axxhushi dhe z. Kreshnik Petku. Grupi i audituesve të KLSH-së u mirëprit nga Zv. Presidenti i TCA-së, z. Ahmet Tezcan, i cili përshëndeti dhe takimin e punimeve.



Gjatë vizitës studimore u prezantuan auditime të realizuara për çështjet e mbrojtjes dhe sigurisë nga Gjykata Turke e Llogarive. Audituesit e KLSH-së u njohën me eksperiencën dhe metodologjinë e TCA-së në auditimin e fushës së sigurisë.

Si pjesë e programit, i cili u mbajt me mbështetjen e Agjencisë Turke për Bashkëpunim dhe Koordinim (TIKA), u organizuan vizita në terren në institucione dhe organizata të ndryshme, si: Xhandarmëria Turke dhe Agjencia e Industrisë së Mbrojtjes, Memoriali M. K. Atatürk në Presidencën e Turqisë, Asambleja I dhe II e qeverisë turke.

Seminari i IDI-t për vlerësimin e performancës së SAI PMF

Në datat 2-6 qershor 2025 u zhvillua në Stamboll seminari për zbatimin dhe vlerësimin e Performancës së Institucioneve Supreme të Auditimit (SAI PMF), organizuar nga Iniciativa për Zhvillim e INTOSAI-t (IDI). Ky aktivitet kishte si synim forcimin e mëtejshëm të kapaciteteve dhe njohurive për metodologjinë dhe zhvillimet aktuale të Kornizës për Matjen e Performancës së Institucioneve Supreme të Auditimit, si dhe njohuritë për rishikimin e pavarur të vlerësimeve në kuadër të EUROSAI-t.

Agjenda e seminarit u fokusua në analizën e thelluar të shkaqeve, duke u bazuar në të gjitha aspektet që ndikojnë në performancën e institucionit, si dhe mbi vlerësimin e integruar.

Përfaqësuesit e institucioneve homologe zhvilluan diskutime dhe prezantime, duke ndarë përvojat dhe praktikatat më të mira mbi tema të rëndësishme që lidhen me procesin e vlerësimit të performancës së institucioneve supreme të auditimit, menaxhimin e cilësisë dhe vlerësimet e pavarura.



KLSH bashkëpunon me Zyrën Kombëtare të Auditimit të Norvegjisë për auditimet e performancës




Në kuadër të bashkëpunimit ndërinstytucional që Kontrolli i Lartë i Shtetit (KLSH) ka me Zyrën Kombëtare të Auditimit të Norvegjisë (NAO), Departamenti i Auditimit të Performancës zhvilloi në datat 3-5 qershor 2025 një vizitë pune në Bergen, e cila kishte në fokus auditimet që po realizohen me asistencën e audituesve norvegjezë.

Në këtë vizitë pune nga KLSH morën pjesë audituesit: z. Aulent Guri, znj. Arminda Bushi, znj. Eva Kushta, znj. Vjola Kojani, znj. Annavanessa Hoxhaj, z. Klarenc Xhaferaj, znj. Xhuljeta Çelaj, znj. Brisilda Hyka, znj. Arjeta Çoku dhe znj. Jorida Zhegu.

Vizita kishte për qëllim diskutimin dhe analizimin e ecurisë së dy auditimeve që janë zhvilluar me asistencën e homologëve norvegjezë: *"Cilësia e ujërave në plazhe"* dhe *"Shërbimi psiko-social në sistemin arsimor parauniversitar"*. Gjatë tre ditëve të workshopi-t u diskutuan gjetjet, struktura dhe mënyra e përmirësimit të raportit, u analizuan metoda të reja për rritjen e cilësisë së auditimeve si dhe u shkëmbyen ide për forcimin e bashkëpunimit.

Grupi i auditimit për temën *"Cilësia e ujërave në plazhe"* diskutoi mbi përmbajtjen e çështjeve të trajtuara, strukturën dhe përshkrimin e tyre në raport, si dhe mbi formulimin e gjetjeve dhe rekomandimeve. Grupi i auditimit pati gjithashtu mundësinë të ndjekë një prezantim nga një përfaqësuese e Bashkisë së Bergenit lidhur me përvojën e kësaj bashkie në monitorimin e cilësisë së ujërave larës dhe në menaxhimin e ujërave të ndotura urbane.



Grupi i auditimit, i fokusuar në *"Shërbimin psiko-social në sistemin arsimor parauniversitar"* punoi ngushtësisht me tre auditues të SAI-t të Norvegjisë për ndërtimin dhe zhvillimin e programit të auditimit, i cili u finalizua në janar 2025 dhe u mbështet mbi tri shtylla kryesore: cilësia e shërbimit të ofruar, kapacitetet ekzistuese dhe politikat institucionale në këtë fushë. Gjatë workshop-it u paraqit edhe një prezantim nga Universiteti i Bergenit mbi *"Shërbimin psiko-social në shkollë"*, për t'u njohur me mënyrën se si është i organizuar shërbimi në këtë vend dhe studimet e zhvilluara në këtë fushë.

Homologët norvegjezë kanë ndihmuar në orientimin e grupit auditues të KLSH-së drejt një qasjeje më të thjeshtë dhe të kuptueshme për një audiencë të gjerë, përfshirë publikun, median dhe Kuvendin.

Në kuadër të zgjerimit të bashkëpunimit për të ardhmen u propozuan disa mundësi konkrete, përfshirë realizimin e auditimeve paralele me SAI-n e Norvegjisë për tema të përbashkëta, si dhe përfshirjen e audituesve shqiptarë në auditime që zhvillohen nga homologët norvegjezë.

Zyra Kombëtare e Auditimit të Suedisë zhvillon Bllok III të Programit të Trajnimit për Auditimin e Performancës


Në datat 24-27 qershor 2025 u zhvillua në Shkup Bllok III i Programit të Trajnimit për Auditimin e Performancës, i organizuar nga Zyra Kombëtare e Auditimit të Suedisë (SNAO). Trajnimi u zhvillua përmes një kombinimi të prezantimeve teorike, ushtrimeve praktike, punës në grupe, duke nxitur një proces të strukturuar dhe bashkëpunues.

Në këtë bllok trajnimi pjesëmarrësit ndoqën një program intensiv, i cili kishte për qëllim të forconte aftësitë analitike dhe metodologjike për përgatitjen e programit të auditimit të performancës. Ky bllok thelloi njohuritë e fituara nga dy blloqet e mëparshme, duke u fokusuar në mënyrën se si ndërtohet një program auditimi i bazuar në problem, si përzgjidhen teknikat më të përshtatshme audituese dhe si argumentohet qasja metodologjike për auditimet konkrete që grupet kishin në zhvillim. Rëndësi e veçantë iu kushtua studimeve të rasteve si një metodë thelbësore në auditimin e performancës.



Nga KLSH morën pjesë në këtë trajnim auditueset Annavanessa Hoxhaj, Lorena Liçi dhe Arjeta Çoku, të cilat po zhvillojnë auditimin e performancës me temë "Kujdesi komunitar për të moshuarit dhe decentralizimi i shërbimit".

UN Women Albania - KLSH, prezantohet Udhëzuesi për Auditimin e Ndjeshëm Gjinator



Në datën 12 qershor 2025 u zhvillua sesioni i prezantimit të Udhëzuesit për Auditimin e Ndjeshëm Gjinator, përgatitur nga UN Women Albania. Ky udhëzues vjen si rezultat i punës së përbashkët me KLSH-në, në vijim të nënshkrimit të Memorandumit të Mirëkuptimit dhe hartimit të planit të punës së përbashkët mbi aktivitetet që do të zhvillohen në të ardhmen.

Nga Kontrolli i Lartë i Shtetit në këtë takim morën pjesë auditues dhe përfaqësues nga departamente dhe drejtori të ndryshme, me qëllim njohjen dhe diskutimin në një shkallë më të gjerë mbi udhëzuesin praktik, i cili, edhe pse kryesisht është i fokusuar në auditimet e performancës, do të mund të shërbejë gjithashtu si dokument pune edhe për llojet e tjera të auditimeve për të mundësuar përfshirjen e perspektivës gjinore në të gjitha proceset e auditimit publik. Ky udhëzues do të shërbejë gjithashtu në zgjerimin dhe rritjen e kapaciteteve profesionale të audituesve duke nxitur shkëmbimin e njohurive për të vlerësuar në mënyrën e duhur pabarazinë gjinore dhe për të promovuar dhe rekomanduar ofrimin e shërbimeve të duhura nëpërmjet auditimeve specifike gjinore jo vetëm në nivel kombëtar por dhe më gjerë.



Në takim u diskutua mbi fazat e procesit të auditimit, identifikimin e rasteve të pabarazisë gjinore, rolin e KLSH-së në integrimin e kësaj perspektive në procesin e auditimit.

Workshop rajonal në Prishtinë për barazinë gjinore



Me mbështetjen e organizatës UN Women, në datat 9-10 qershor 2025 u organizua në Prishtinë takimi rajonal me temë "Inicativë për auditim të ri të performancës në bashkëpunim". Aktiviteti mblodhi përfaqësues nga Institucionet Supreme të Auditimit (ISA) të tri shteteve dhe partnerë të tjerë, për të diskutuar mundësitë e zhvillimit të auditimeve të përbashkëta me fokus në fuqizimin e grave në vendimmarrje dhe barazinë gjinore.

Nga KLSH morën pjesë në këtë aktivitet z. Aulent Guri, drejtor i Departamentit të Auditimit të Performancës dhe auditueset znj. Eva Kushta dhe znj. Arjeta Çoku.

Aktiviteti ishte pjesë e programit rajonal "Financim Transformues për Barazinë Gjinore në Ballkanin Perëndimor", i mbështetur nga Qeveria e Suedisë nëpërmjet SIDA-s dhe i zbatuar nga UN Women në Kosovë, Shqipëri, Maqedoninë e Veriut, Bosnjë dhe Hercegovinë dhe Serbi.






Objekti kryesor i këtij takimi pune ishte diskutimi me ekipet e audituesve nga Institucionet Supreme të Auditimit (SAI) përkatëse mbi iniciativën për auditimin e ri bashkëpunues të performancës me temë "Gratë Lidere - Gratë në Politikë, Parlament dhe në Pozicionet Lideri në Qeverinë Qendrore".

Përfaqësuesit e Institucioneve Supreme të Auditimit diskutuan, ndanë praktikat dhe përvojat e tyre në kryerjen e auditimeve të lidhura me barazinë gjinore dhe ndikimin që këto auditime kanë për temën në fokus.

Bashkëpunimi me SAI homologe mundëson një analizë të thelluar të politikave ekzistuese, identifikimin e boshllëqeve në zbatimin e kuotave gjinore dhe vlerësimin e ndikimit të strategjive për barazinë gjinore.

Falënderit për leximin!

© Të gjitha të drejtat e rezervuara nga KLSH

 www.klsh.org.al	 Kontrolli i Lartë i Shtetit
 E-mail: klsh@klsh.org.al info@klsh.org.al	 klsh_org_al
 Rruga "Abdi Toptani" Nr.1 Tiranë	 (KLSH) Albanian Supreme Audit Institution
	 Orari pritjeve për publikun: E hënë – E enjte: 08:00 – 16:30 E premte: 08:00 – 14:00